

## Minister Dangui Oduber y SNBA a firma posibel MOU

**ORANJESTAD –** Diamars atardi Minister di Turismo Dangui Oduber a reuni cu representantenan di San Nicolas Business Association (SNBA), Nassi, De Freitas, Hernandez y Brooks. E meta di reunion aki ta pa Ministerio di Turismo, ATA y SNBA por yega na un acuerdo unda SNBA tambe ta forma parti den tur e desaroyonan di San Nicolas y proteccion di su identidad, tur esaki por medio di un MOU.

Segun e comunicado cu Bon Dia Aruba a ricibi ta indica, cu San Nicolas ta den pleno desaroyo y SNBA ta organisando e prome San Nicolas "Business Summit" caminda cu inversionistanan internacional lo ta presente pa asina hunto cu gobierno haci un esfuerzo pa yega na solucionnan favorable pa e comunidad di comercio na San

Nicolas y vecindario. Minister Oduber a mostra SNBA riba tur e proyectonan cu ta na caminda pa San Nicolas, proyectonan manera Visitor Information Center remodela, Pier na Rodger's Beach, Baby Beach Promenade y Ex Maria Christina School cu lo bira un facilidad di haci recreacion.

Minister Dangui Oduber a duna di conoce cu SNBA tin e deber pa prepara San Nicolas pa haci mihor uzo di tur e desaroyonan cu ta na caminda. Di otro banda SNBA su deseo ta pa e Consejo di Turismo pa San Nicolas, resorta bou di nan organisacion pa asina hunto cu Gobierno sigui desaroya y proteha e atraccionnan di San Nicolas. Un reunion frutifero y cu pronto San Nicolas lo conoce hopi desaroyo economico positivo y na mes momento protegiendo tur su atraccionnan natural.

Minister Oduber a mostra SNBA riba e hecho cu Ministerio di Turismo hunto cu

ATA ya caba tin palabracion haci pa sigui promociona San Nicolas como "Sun Rise City". Minister Dan-

gui Oduber ta un persona cu semper ta pone accion tras di su palabranan.

